

**Protocol no. 119****Sezzüda da lündeschdi, 7 november 2011 – 20.00-23.00**

**Preschaints:** Jon Carl Rauch; Chasper Alexander Felix, Georg Salomon, Marianne Werro-Lehmann, e Claudia Luppi (protocol)

**S-chüsà:** Jachen Andri Schmidt

**Protocol**

Il protocol no. 118 da la sezzüda da lündeschdi, 31. october 2011 vain approvà.

**1061 021****FABRICA****Jon Lansel – Isolaziun dal stabilimaint agricul utilisà sco magazin, Palüzot**

Als 26 settember 2011 ha sar Jon Lansel survgni il permiss per ün müdamaint d'adöver dal stabilimaint agricul a Palüzot chi gniss dovrà in avegnir sco magazin. Il permiss es gnü dat in basa al permiss dal chantun (BAB), chi admetta il müdamaint d'adöver be culla cundiziun chi nu vegnan fats müdamaints vi dal fabricat.

Sar Jon Lansel fa uossa davopro la dumonda da pudair isolar il stabilimaint, causa cha quel gniss utilisà sco magazin per ogets d'art da gronda valor chi stuvevan gnir conservats in ün local cun üna temperatura minimala da tschinch grads.

Our da la dumonda per isolar il stabilimaint nu resulta sch'id es previs da raggiundscher la temperatura da tschinch grads unicamaing cun isolar las paraids ed il tet, o sch'id es previs d'installar amo alch s-chodamaint. L'istallaziun d'ün s-chodamaint pretendess üna dumonda da fabrica cun indicaziuns precisas dal gener dal s-chodamaint.

Il Cussagl cumünal decida da nun entrar per intant sülla dumonda da sar Jon Lansel e da til giavüschar d'inoltrar la dumonda cun indicaziuns plü precisas a regard il möd previs per mantegner la temperatura necessaria.

**1062 021****FABRICA****Andreas Ovenstone – Müdamaint da la posiziun da l'installaziun termosolara, Plaz**

Tenor il permiss da fabrica chi d'eira gnü dat a man dal proget per la renovaziun da la chasa 37 e 37 inoltrà d'eira previs da metter l'installaziun termosolara sün l'ala da tet vers ost. Sar Ovenstone fa uossa la dumonda da pudair müdar la posiziun per l'installaziun termosolara da l'ala da tet vers ost sün l'ala da tet vers vest. Il Cussagl cumünal decida da dar il permiss per quist müdmaint dal proget.

La taxa da trattamaint importa frs. 50.—

1063 860

**PROVEDIMAINTE ELECTRIC  
Fundaziun da l'instituziun „Rait Engiadina“ (RE)**

La giunta da la corporaziun dals cumüns concessiunaris da las OEE ha elavurà la documainta da basa per unir las raits electricas dals cumüns concessiunaris. La proposta da la giunta es cha'ls cumüns interessats fundan cumünaivelmaing ün'instituziun da dret public autonoma (selbständige öffentlich-rechtliche Anstalt / SÖRA) cul nom „Rait Engiadina“ (RE) chi ha per mera da s-chaffir structurass professiunalas ed effiziantas per ün provedimaint d'electricità independent a favur dals cumüns interessats. L'andamaint da la RE es previs seguaintamaing: La RE cumpra giò la rait electrica dals cumüns interessats e surpiglia il custodi da la rait e la gestiun. Il cumüns interessats sun lura commembers da la RE. Ils organs da la RE correspuondan plü o main a quels d'üna società anonima(SA) cun cussagl administrativ, direcziun e post da revisiun, ma invezza da la radunanza d'acziunaris esa previs la radunanza da proprietaris ingiò cha mincha cumün partecipà, independent da la grondezza, ha il dret da duos sezs e da duos vuschs. La surveglianza da la RE e las decisiuns restan pro'ls cussagls cumünals chi pon però, a favur d'üna procedura plü speditiva, transferir tschertas competenzas a lur delegiats i'l cussagl administrativ da la RE. Ils cumüns interessats surdan insembel culla rait electrica eir las parcellass da terrain, ils edifizis ed implants per la valur actuala, implü eir tuot las servituts chi stan in connex culla rait electrica. Ils implants da l'igluminaziun publica sco eir ils implants electrici pitschens nu vegnan transferits a la RE. La cumprita e la vendita da l'energia da concessiun restan inavant sco fn qua pro'ls cumüns sco eir il dret da fixar autonomamaing las taxas e prestaziuns. Percunter vain l'elavuraziun administrativa dals quintes evasa da la RE per tuot ils commembers. Quist affar es uossa illa fasa da consultaziun. La radunanza d'orientaziun ed in seguit la votaziun a l'urna sun previsas pel prüm quartal dal 2012.

1064 070.503.04

**Chasa cumünala Misoc  
Pedel per l'andamaint da la sala cumünala**

Causa chi nun es avantman ün pedel chi ha la surveglianza da la sala cumünala, daja adüna darcheu situaziunss cha la sala nun es surdatta in uorden per ün arandschamaint, ma chi nu vain eir na controllà il stadi da la sala davò ün'occurenza. Our da quel motiv decida il Cussagl cumünal da scriver oura la piazza da pedel. Quista piazza cumpiglia la surveglianza ed il custodi da la sala cumünala e da la chadafö, q.v.d. preparar la sala per arandschamaints, surdar las localitass e tillas tour giò darcheu, evt. esser preschaint per agüd technic d'ürant las occurenzas, pisserrar cha las localitass sajan nettas pe'ls prossems adövers, controllar ed actualisar l'inventar, custodir ils indrizs sco glüms, maschina da lavar giò o plattas electricas, postar urdegns e mezs per pulir. Il post vain pajà ad uras. La publicaziun da la piazza ha lö aint il prossem mas-chalch.

1065 140.427.01

**Fit dal local da pumpiers  
Nouv local pel corp da pumpiers Pisoc a Scuol**

In vista cha las localitass cha'l cumün da Scuol vaiva a fit fin uossa pel corp da pumpiers Pisoc nu sun plü adattats causa chi sun gnüts pro daplüs vehiculs ed urdegns, ha il cumün da Scuol tscherchà da pudair tour a fit megldras localitass. Quellas sun gnüdas chattadas i'l stabilimaint cha la firma da W. Zegg fabrica in vicinanza dal deposit actual. Quist stabilimaint cumpiglia garaschas fich adattadas per l'adöver sco local da pumpiers. Il fit annual importa frs. 57'500.--. Ils cuosts pel fit vegnan scumpartits tenor la clav da scumpart süls cumüns dal consorzi e sun calculats i'ls preventivs cumünals dal 2012. In quist connex vain manzunà eir l'adattamaint dal fit pel local da pumpiers a Sent chi as rechatta uossa aint il lavoratori chi spordscha localitass bainquant plü confortablas co'l local vegl in chasa da scoula. Quist tema sto però gnir discussünà i'l consorzi Pisoc.

1066 020

**ADMINISTRAZIUN CUMÜNALA**

**Documainta per chargiar da la pagina d'internet da Sent**

Sün intimaziun da votantas e votants decida il Cussagl cumünal d'incumbenzer a noss webmaster d'installar ledschas e reglamaints dal cumün da Sent sülla pagina d'internet per chargiar giò.

1067 860.315.01

**Mantegnimaint provedimaint electric**

**Rimplazzamaint d'üna pütta dubla da forza electrica**

A Crusch esa da rimplazzar üna pütta dubla da forza electrica. Per quist lavur da mantegnimaint da il Cussagl cumünal liber ün credit da frs. 4'500.—

1068 021

**FABRICA**

**Dumonda a regard d'ürada dal permiss provisoric**

Sar Erich Schweizer constatta cha'l büro da masüraziun Kindschi haja masürà oura la stalla da giallinas cun suottets da sar Men Zanetti per actualisar ils plans dal cumün. Tenor il savair da sar Schweizer exista be ün permiss provisoric per la gronda part dals fabricats. Causa quista masüraziun giavüscha sar Schweizer sclerimaint in scrit a regard la d'ürada dal permiss da fabrica. Il Cussagl cumünal decida da confermar a sar Schweizer in scrit cha'l permiss pels stabilimaints cun suottets fabricats davopro saja dat provisoric fin la fin dal 2014 e cha la masüraziun dal büro da masüraziun nu saja ingün indiz per ün eventual müdamaint dal permiss.

1069 942

**POSSESS DA FINANZAS D'EDIFIZIS**

**Dumonda per pudair cumprar terrain cumünal**

Sar Martin Pernet dumonda scha'l Cumün füss pront da ceder ün toc terrain da ca. 12 m2 chi as stumpla sco ün cuogn aint in seis possess. A la glistessa dumonda as vaiva da seis temp stuvü dar üna resposta negativa causa cha quist toc terrain vaiva sü l'agravi da vial per la parcella vaschina. Causa cha la parcella vaschina es hoz surfabricada e cha'l vial nu vain plü dovrà, decida il Cussagl cumünal d'aderir quista jada al giavüscha da sar Pernet e da vender ils raduond 12 m2 terrain da fabrica pel predscha üsità a Sent cun las sequaintas cundiziuns:

- a. Scha'l terrain gniss darcheu dovrà p.ex. causa schlargiamaint da la via, schi pudess il Cumün cumprar inavò il terrain pel glistess predscha (incl. l'incharimaint).
- b. Il Cumün ha il dret d'ingrondir in cas da bsögn la staziun da trafo chi as rechatta sü'l terrain privat da sar Pernet.

L'actuara: